

nicht aufwarten/ vnd endtlich gegen ihren Herren mit der Rechnung nicht bestehen können: Vnd wenn man von ihnen die schuld oder den außstand fordert/ so weisen sie das dedit, die außgabe vnd die angewendten kosten für das Gelt.

Er sol sich auch hüten/ daß er nicht bey dem Wein Rauffschlage/ vnd in den Zechen sein Verwiltig mache.

Auch laß er die Rechnung nicht zu lang anstehen/ daß der Meyer von langen zeiten her eine Rechnung bringen müsse: Vnd vertrawet/ oder leget ihm nicht weiter auff/ denn sein gedächtnuß tragen mag.

Hieben sol er auch von allerhand bräuchlichem Feldzeug zwofach so viel im Vorrhat haben/ als sonst die anzahl seiner Werckleut gemeinlich erheischet/ damit er nichts von seinen Nachbarn dörfft entlehnen/ sonst möcht ihm an Tagwercken/ die nicht vollgethan würden/ viel mehr abgehen/ denn er vmb allerhand außstehenden Eisenzeug möchte außgeben.

Ferner sol er auch allweg das erste mal also seine geschäfte verrichten/ damit er nicht dörfft in einem ding zweymal die zeit vnd arbeit zubringen.

Er muß sich befeissen/ allzeit ein Aug auff sein Gesinde zu haben/ vñ alle abend sein Viehe zu besuchen/ vnd zu besichtigen/ nicht allein in den Ställen/ sondern auch/ wenn sie von der arbeit/ oder der Weide kommen: Ja/ gar eigentlich sol er beschawen/ was sie tragen/ wie sie gehen vnd treten/ vnd was sie für gebärden erzeigen: Hiemit zusehen/ vnd zu erfahren/ ob ein Kranckheit oder schwachheit vnd prestien darhinder stecke: Vnd diß stück sol nicht ein kleins theil seiner sorge seyn/ vnd mit solchem in keinen weg dispensiren/ noch etwas nachgeben/ sonderlich gegen Ochsen/ Kühen/ Schaaffen/ Lämmern/ Säuwen/ &c. Denn es trägt sich bald zu/ daß sie gesund vnd frisch auff die Weide außgehen/ vnd auff den Abend franck widerumb heym kommen.

Kein mal sol er schlaffen gehen/ er hab denn den Abend zuvor seinem Gesinde alle verordnung gethan/ was sie auff morgen thun vnd verrichten sollen.

Der legt sol er sich zur Ruhe begeben/ vnd mit dem Tag auffseyn/ daß er sein Gesinde sehe zu arbeit gehen/ vnd wie sie sich darzu anschicken.

Deßgleichen sol er alle morgen seinen Grund vmbgehen/ vnd sehen/ wie sich der Boden anlaße vnd halte.

Sein Viehe/ sol er mit der Arbeit nicht vbertreiben/ noch abmartern lassen: Vnd darbey müssen/ was für Arzney vnd Mittel zu gebrauchen seyen zu ihren fällen/ stößen/ mißtritt/ verrennen/ hinken/ vnd andern vnfällen.

Das fünffte Capitel.

Wie ein Bawer einen verstand vnd vorwissen haben solle/ von künfftigem Wetter/ vnd änderung des Gewitters.

Vwol ein Meyer nicht gelehrt seyn solle/ doch sol er auß langer gewisser erfahrung etwas erkänntniß haben/ von vorbedeutungen der Regen/ Wind/ schöner Zeit/ änderung des Himmels/ vnd der Luft. Deßgleichen/ von abtheilung des Jars/ vnd ihren Engenschafften/ vom Ungewitter/ Platzregen/ Donner/ Pliß/ Kälte/ Frost/ Hagel/ vnd dergleichen/ auff daß er nach jeder Jarzeit der gelegenheit die Arbeit angreiffe/ vnd seine Werckleut darzu anweise.

Künfftigen Regen/ kan er auß folgenden/ oder andern dergleichen Zeichen/ abnehmen/ Wenn der Mond/ so erst New ist worden/ tünckele Hörner hat/ so wirts regenen: Wenn das hoch Horn des zunehmendenmonds tünckeler ist/ als der nidrige/ wirts im abnehmen regenen: Ist das nidrige tünckeler als das hohe/ so regnets in den ersten Quarten: Ist er in der mitten schwarz/ so regnets im vollen Mond. Wenn der zunehmende gegen Nidergang sihet/ oder neiget/ ist auch ein anzeigung des Regens: Ist denn der Vollmond mit dämpffen vmbgeben/ vnd hat einen/ oder mehr schwarze vnd dicke Circul herumb: Oder/ so er bleich sihet/ ist deßgleichen Regen vorhanden.

Er wirt auch warnemen/ wenn der vierdte Tag/ oder/ wie etliche wollen/ der fünffte Tag desmonds/ Regenwitterig ist/ denn diese Tage zeigen seine ganzē lauff an/ Es sey mit Regen/ Wind/ oder schönem Wetter.

Deßgleichen bedeuts auch Regen/ wenn die Sonne/ so sie auffgehet/ Rot ist/ vnd gleich daruff schwarz wirt. Wenn vmb die streimen der Sonnen/ so sie auffgehet/ eine kleine tünckele Wolck erscheinet. Wenn sie zu ihrem Auffgang/ gleichsam tieff versuncken/ anzusehen ist: Oder/ wenn sie

D

etliche